

**Soraarnerussutisiaqalernissamut aaqqissuussinermut peqataasussaataaneq pillugu
Inatsisartut inatsisaata allanngortinneqarnissaa pillugu Inatsisartut inatsisaat nr. 18, 30.
november 2020-meersoq**

§ 1

Soraarnerussutisiaqalernissamut aaqqissuussinermut peqataasussaataaneq pillugu Inatsisartut inatsisaanni nr. 21, 28. november 2016-imeersumi, Inatsisartut inatsisaanni nr. 16, 12. juni 2019-imeersukkut allanngortinneqartumi makkuninnga allanngortitsisoqarpoq:

1. § 1, imm. 2-4, imatut oqaasertalerneqarput:

” Imm. 2. Akiliisarneq kingusinnerpaamik aallartinneqassaaq ukiumi aningaasarsiorfusumi inuup 18-inik ukioqalerfiata tulliani, aammalu ukioq aningaasarsiorfusoq pineqartup soraarnerussutisiaqalertussatut ukioqalerfissaa ukiunik 4-nik sioqqullugu unitsinneqarsinnaalluni.

Imm. 3. Soraarnerussutisianut aaqqissuussineq soraarnerussutisiaqarnissamut aningaasaateqarfimmi Danmarkimi imaluunniit Kalaallit Nunaanni angerlarsimaffeqartumi, imaluunniit inuunermut imaluunniit soraarnerussutisiaqarnissamut sillimmasiisarfimmi Danmarkimi imaluunniit Kalaallit Nunaanni angerlarsimaffeqartumi, imaluunniit aningaaserivimmi Kalaallit Nunaanni angerlarsimaffeqartumi imaluunniit aalajangersimasumik ingerlatsiveqartumi, pilersinneqarsimassaaq, taamaattoq takuuk imm. 4. Soraarnerussutisiaqarnissamut aningaasaateqarfik, inuunermut imaluunniit soraarnerussutisiaqarnissamut sillimmasiisarfik imaluunniit aningaaserivik aningaasalersuineramik suliaqarneq pillugu inatsimmi pineqartunut ilaassasoq aammalu allatigut suliaqarneq pineqartoq ingerlannissaanut Finanstilsynimit akuersissummik peqassasoq, piumasaqaataavoq.

Imm. 4. Piffissami sivisunerpaamik ukiunik aningaasarsiorfusunik marlunnik sivisussuseqartumi soraarnerussutisianut aaqqissuussinermut Norgemi, Savalimmiuni, Islandimi imaluunniit nunami EU-mut ilaasortaasumi pilersinneqarsimasumut akiliisoqartarsinnaasoq, akileraartarnermut ingerlatsivik qinnuteqarneq malillugu akuersissummik tunniussisnaavoq. Qinnuteqaat kingusinnerpaamik akileraartussaataalernerup kingorna qaammatit pingasut qaangiutsinnagit nassiunneqassaaq. Akuersissummumut piumasaqaataavoq inuk atorfeqarnerminut ilaatillugu nunamit pineqartumit Kalaallit Nunaannut nuussimassasoq aammalu soraarnerussutisianut aaqqissuussineq nuunnissaq sioqqullugu pilersinneqarsimassasoq. Aammattaaq piumasaqaataavoq inuup ukiut aningaasarsiorfusut marluk sinnerlugit Kalaallit Nunaanniinnissaa naatsorsuutigineqanngitsoq.”

2. § 2 imatut oqaasertalerneqarpoq:

” § 2. Ieqqaarnissamut tunngaviusut tassaapput inuup A-nit aamma B-nit isertitai katillugit, aningaasat aningaasarsianit akileraarutit pillugit Inatsisartut inatsisaanni § 41, imm. 2, aamma § 47 b, imm. 6 malillugit isertitanik akileraaruteqaataasussanik naatsorsuinerמי ilaatinneqartussaannngitsut ilassutigalugit, taamaattoq takuuk imm. 2 aamma 3.

Imm. 2. Ileqqaarnissamut tunngaviusut naatsorsorneqarneranni makku naapertorlugit tunniunneqartartut ilanngunneqassanngillat:

- 1) Kalaallit Nunaanni Namminersornerullutik Oqartussani kommuninilu tjenestemandit pillugit Inatsisartut inatsisaat,
- 2) Tjenestemandit Inatsisartut suliffeqarfiini atorfillit pillugit Inatsisartut inatsisaat,
- 3) Naalagaaffimmi tjenestemandit atorfillit Kalaallit Nunaanniittut pillugit inatsit,
- 4) Tjenestemandit pillugit inatsit
- 5) Inuit innarluutillit taperserneqartarnissaannut Inatsisartut inatsisaat,
- 6) Meeqqanut tapiissutit pillugit Inatsisartut inatsisaat,
- 7) Meeqqat tapersorsorneqarnissaannut Inatsisartut inatsisaat,
- 8) Pisortanit ikiorsiissutit pillugit Inatsisartut peqqussutaat,
- 9) Utoqqalinermi pensionisiat pillugit Inatsisartut inatsisaat,
- 10) Siusinaartumik pensionisiat pillugit Inatsisartut inatsisaat,
- 11) Inissiani attartukkani ineqarnermut tapiissutit pillugit Inatsisartut inatsisaat,
- 12) Ilinniagaqarnersiutit pillugit Inatsisartut inatsisaat, aamma
- 13) Borgmesterinik borgmesterillu tulliinik kiisalu kommunalbestyrelsinut nunaqarfinilu aqutsisunut ilaasortanik aamma najukkani ataatsimiititaliat ilaasortaannut il. il.

akissarsiaqartitsineq pillugu Namminersorlutik Oqartussat nalunaarutaanni nr. 25, 30.

december 2013-imeersumi § 2, § 12 aamma § 14, akissarsiat aamma ilaasortaajunnaarnersiutit borgmesterinut taakkulu aappaannut meeraannullu pensionisiaqartitsineq pillugu Namminersorlutik Oqartussat nalunaarutaat nr. 24., 30. december 2013-imeersumi § 10, imm. 3, imaluunniit § 10, imm. 4 naapertorlugit pensionisiantut tapiissutinut tunngavissiisut, ilaanatik.

Imm. 3. Ileqqaarnissamut tunngavissanik naatsorsuinermi makku aamma ilanngunneqassanngillat:

- 1) meeqqanut akilersuutit, inuup angajoqqaavinit pisortanilluunniit akilerneqartussat, aamma
- 2) pensionisiatut tunniunneqartut allat, Utoqqalinersiaqarneq pillugu Inatsisartut inatsisaanni pineqartunut ilaanngitsut.”

3. § 3 imatut oqaasertalerneqarpoq

” **§ 3.** Inuup soraarnerussutisianut aaqqissuussineranut ukiuni aningaasarsiorfiusuni 2021-mi aamma 2022-mi akiliutit, ileqqaarnissamut tunngaviusut 150.000 koruuninik amerlanerusunilluunniit annertussuseqarpata, ileqqaarnermut tunngaviusut 6 procentiannit annikinnerussanngillat, taamaattoq takuuk imm. 2 aamma 5. Ukiut aningaasarsiorfiusut 2023-mit 2026-mut aallarnerfigalugit ilanngullugillu procentiliussa q ukiumut 1 procentimik qaffanneqartassaaq, taamaalilluni akigititaq 2026-mi 10 procentiussalluni.

Imm. 2. Namminersorluni inuussutissarsiornermik suliaqarnermi sinneqartoorutit 150.000 koruuninik annertunerusunilluunniit annertussuseqarpata, imm. 1-imi aalajangersagaq apeqqutaatinnagu inuup ukiuni aningaasarsiorfiusuni 2021-mi aamma 2022-mi soraarnerussutisianut aaqqissuussinerminut akiliutai akileraaruteqaataasussat sinneqartoorutit 4 procentiinit **annikinnerussanngillat**, taamaattoq takuuk imm. 5. Ukiumi aningaasarsiorfiusumi 2023-mi akiliutit namminersorluni inuussutissarsiornermik

suliaqarnermi akileraaruteqaataasussat sinneqartoorutit 5 procentiinit annikinnerussanngillat aammalu 2024-mit ukiunilu aningaasarsiorfiusuni tulliini 6 procentiinit annikinnerussanatik.

Imm. 3. Imm. 1 malillugu akigititap atuuttoq ileqqaarnissamut tunngaviusut 100.000 koruuninik annertussuseqarpata inunnut akigititap 0 procentianiit ileqqaarnissamut tunngaviusut 150.000 koruuninik annertussuseqarpata inunnut akigititap 100 procentianut assigiimmik qaffakkiartuaartinneqassaaq.

Imm. 4. Namminersorluni inuussutissarsiornermik suliaqarnermi imm. 2 malillugu akigititap atuuttoq, sinneqartoorutit 100.000 koruuninik annertussuseqarpata inunnut akigititap 0 procentianiit sinneqartoorutit 150.000 koruuninik annertussuseqarpata inunnut akigititap 100 procentianut assigiimmik qaffakkiartuaartinneqassaaq.”

Imm. 5. Pisuni imm. 1-imi aamma 2-imi taaneqartuni, inuup soraarnerussutisianut aaqqissuussineranut ukiumi isertitaqarfiusumi ataatsimi 200.000 koruuninik imaluunniit annertunerusunik akiliisoqareernerani, akiliisussaataitaaneq atorunnaassaaq.”

4. § 4 imatut oqaasertalerneqarpoq:

” § 4. Aalisarnermit, piniarnermit, aallaaniarnermit, savaateqarnermit aamma kusanartuliornernit tunisassianik tunisinerni akileraarutininik unerartitsinissamut pisussaaffeqartoq, tunisisut soraarnerussutisianut aaqqissuussinerannut akiliutissanut akiliinissamik, pisussaaffeqartoq pillugu maleruagassanik Naalakkersuisut aalajangersaasinnaapput. Akiliutissaq tunisinerup aningaasartaasa ilaannik, § 3, imm. 2 malillugu akigititanit atuuttunit annikinnerusumik, annertussuseqassasoq, Naalakkersuisut tassunga ilanngullugu aalajangersaasinnaapput.

Imm. 2. Akiliuteqartussaataitaasup tiguisussap soraarnerussutisianut aaqqissuussinera ilisimasaqarfiginngippagu, akiliutissaq imm. 1-imi taaneqartoq akileraartarnermut ingerlatsivimmut akilerneqarsinnaasoq pillugu maleruagassanik aammattaaq Naalakkersuisut aalajangersaasinnaapput. § 7, imm. 6-imi aamma 7-imi, aamma § 8-mi aalajangersakkat taamatut pisoqarnerani atuutissapput.”

5. § 5-imi allanngortinneqarpoq ”§ 2” uunga: ”§ 3”.

6. § 7, imatut oqaasertalerneqassaaq:

” § 7. Ukiup aningaasarsiorfiusup siuliani inuup soraarnerussutisianut aaqqissuussineranut aningaasat minnerpaaffissaat § 3-mi pineqartut akilerneqarsimanersut, Akileraartarnermut ingerlatsiviup ulloq 31. august tikitsinnagu naatsorsussavaa.

Imm. 2. Naatsorsuinerup takutippagu inuup soraarnerussutisianut aaqqissuussineranut akiliutit aningaasat minnerpaaffissaannik annikinnerusut, nikingassutaasoq 2.000 koruuninik annertunerusimappat, inuk soraarnerussutisianut aaqqissuussinerminut nikingassutaasoq akilissagaa aammalu akiliineq akileraartarnermut ingerlatsivimmut uppersarsassagaa, akileraartarnermut ingerlatsiviup piumasarissavaa.

Imm. 3. Akileraartarnermut Aqutsisoqarfiup ulloq 1. november tikitsinnagu akiliinermut uppersarsaat tiguisimangippagu, nikingassutaasoq akileraarutininik procentiliussamut tapiliussatut imaluunniit akileraarutit qaffannerisigut akilersinneqassaaq. Taamaattoq

nikingassutaasut, ukiumut aningaasarsiorfiusumut, ukioq aningaasarsiorfiusoq skattekortip atuuffissaa ukiunik 4-nik sioqqullugu, inissisimasumut, tunngassuteqartut akilersinneqarsinnaanngillat.

Imm. 4. Imm. 3 malillugu tapiliussat ukiup aningaasarsiorfiusup tullianut akigitatut atuuttutut annerpaamik annertussuseqarsinnaapput, takuuk § 3, imm. 1 aamma 2. Akileraartarnermut ingerlatsiviup paasiguniuk ukiup aningaasarsiorfiusup ataatsip ingerlanerani inummi nikingassutaasut matussusermissaannut naammattumik akiliisitsisoqarsimasoq, akileraartarnermut ingerlatsivik akileraarummut procentiliussamut ilassusiinani skattekortimik nutaamik tunniussissaaq. Akilersinneqartut inummi nikingassutaasunit annertuneruppata, ukiumi aningaasarsiorfiusumi paasineqartumi akileraarutaagallartutut aningaasartai isigineqassapput.

Imm. 5. Akileraarutinut allagartanik nutaanik tunniussisoqarpat, nikingaassutaasooq annerpaamik arfinileriarluni akilersuinertut akilersinneqassaaq.

Imm. 6. Akileraartarnermut ingerlatsiviup nikingassutaasut akilerneqartut, takuuk imm. 3-5, inuup soraarnerussutisianut aaqqissuussineranut nuussavai.”

Imm. 7. Inuk ingerlasumik soraarnerussutisianut aaqqissuussaartoq akileraartarnermut ingerlatsiviup ilisimanngippagu, imaluunniit soraarnerussutisianut aningaasaateqarfiup imaluunniit soraarnerussutisianik neqerooruteqartup soraarnerussutisianut aaqqissuussinermik pilersitsiviusimasup akileraartarnermut ingerlatsivimmit akiliutinik tiguisarnissaaq kissaatiginngippagu, akileraartarnermut ingerlatsivik pineqartumut soraarnerussutisianut aaqqissuussinermik pilersitsisinnaavoq, takuuk § 8.”

7. § 8-mi “imm. 5 “imm. 7”-inngorlugu allanngortinneqassaaq

8. § 8 kingorna ilanngunneqarpoq:

” § 8 a. Peqqussutini aalajangersakkanik unioqquitsineranut akiliisitsinermik pineqaatissiisarneq pillugu maleruagassanik, peqqussutini inatsit naapertorlugu aalajangersarneqartuni aalajangersaasoqarsinnaavoq.

Imm. 2. Aktiaateqarluni ingerlatseqatigiiffiup, piginneqataassuseqarluni ingerlatseqatigiiffiup, piginneqatigiilluni ingerlatseqatigiiffiup, peqatigiiffiup, suliffeqarfik imminut pigisup, aningaasaateqarfiup assigisaataluunniit unioqquitsineranut akiliisitsinermik pineqaatissiisarneq pillugu maleruagassanik, peqqussutini inatsit naapertorlugu aalajangersarneqartuni aalajangersaasoqarsinnaavoq. Namminersorlutik Oqartussat, kommuni imaluunniit kommunit ataatsimooqatigiiffiat unioqquitsisuuppata, Namminersorlutik Oqartussat, kommuni imaluunniit kommunit ataatsimooqatigiiffiat akiliisitsinermik pineqaatissinneqarsinnaapput.

Imm. 3. Akiliisitsinerit imm. 1 imaluunniit 2 malillugu pisussaaffiliunneqartut nunap karsianut tutsinneqassapput.”

Inatsisartut inatsisaat ulloq 1. januar 2021 atuutilissaaq.

Imm. 2. Ukiumut isertitaqarfiusumut 2020-mut ileqqaarnissamut tunngavissat naatsorsorneqarneranni, tjestemandit pillugit inatsit naapertorlugu aningaasarsiat tunniunneqartut ilanngunneqassanngillat.

Namminersorlutik Oqartussat, ulloq 30. november 2020



Kim Kielsen